



UPA16/128  
12. maj 2016  
Kalistat Lund

**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa siunnersuisoqatigiiffiup Issittumi Siunnersuisoqatigiinnut alaatsinaatsutut inissisimalernissaanik qinnuteqaataanik tapersersueqqullugit.**

(Aallartitat siulittaasuat/Delegationsformand Lars-Emil Johansen)

Issittoq eqqartorneqaleraangat qularnanngitsumik tamatta misigisarpugut nunarput inuiaallu aamma pineqarluta, uagummi nunaqavissuulluta issittormiuugatta.

Issittumi siunnersuisoqatigiit suleqatigiissutigisassamissut siunniussa, aamma taakkorpiaapput, Nunat Avannarliit Killiit Siunnersuisoqatigiiffianni suleqatigiinnermi pingaartinneqartut ilaat. Pinngortitaq, inuit atugarisaanut tunngasut aningaasarsionermullu tunngasut tassaapput siunnersuisoqatigiit arlariullutik pingaartitatut qitiutitarisaat. Ukiuni makkunani nunarsuup avannarpasissua soqutigineqalernikooqaaq, siunissami Qalasersuup Avannarliup sikutaa ungataaniittullu sikuisa aaratarsinnaanerit ilimasaarutigineqartalernerisa kingorna. Aningaasarsionikkut iluaqutiginiarneqarnissaa tamanit soqutigineqaqimmat.

Nunat qangarujussuuneruq arfanniarnermik aalisarnermillu soqutigisaqarnertik patsisigalugit nunatsinnut immaqalu aamma issittormioqatitsinnut soqutigisaqarnikuusimasut, ukiuni kingulliunerusuni soqutiginneqqilernikuupput maannakkut qularnanngitsumik silinnerusumik soqutigisaqarlutik, tassalu imartarujussuannngortussa q q immaqalu periarfissarpassuarnik ammaasaqarsinnaasoq pillugu.

Alaatsinaatsutut inissisimalerusunneq ukiuni kingullerni soqutigineqaleriartorsimavoq aamma nunanit inuttoorujussuarnit nunarsuullu qiterpasissuani inissisimagaluartunit. Isumaqaarpugut issittormiuusugut uagut pineqarfitsinni tatineqartariaqanngitsugut, taamaattumik periarfissat tamaasa atorlugit sunniuteqarnerunissamik siunertaqarluta Issittumi Siunnersuisoqatigiinni alaatsinaatsutut inissisimaffissarsionnissarput pissusissamisooruq.

Taamaattumik Nunat Avannarliit Killiit Siunnersuisoqatigiiffiata, Issittuni siunnersuisoqatigiinnut ataavartussamik alaatsinaatsutut ilaasortanngorniarnissaa tamakkiisumik taperserparput. Maluginiarparput Naalakkersuisut akissuteqaamminni qinnuteqarumaarniarneq apeqquitalimmik akuersaaraat. Nunat Avannarliit Killiit nunarsuatta avannaa tungaa annertoorujussuaq oqartussaaffigalugu inissisimapput, taamaattumik pissusissamisuuinnarpoq uagut soqutigisaqatigiiffitsinni eqqartortakkavut avataanniit eqqartorneqaleraangata aamma malinnaasinnaasarnissarput.

Issittumi Siunnersuisoqatigiinni nunat inuttoorujussuit aammalu issittormioorpiannngikkaluarlutik alaatsinaatsutut peqataasaleriartuaarneranni, pingaaruteqarpoq issittormiuit immikkut isigineqartariaqarnerput. Manna iluatsillugu kaammattuutigerusupparput, nunani issittuni najugallit Issittormiut Siunnersuisoqatigiiffianni oqaaseqarsinnaatitaaajuarnissaat Naalakkersuisutsinniit ilungersuutigineqaqqullugu.

Taama oqaaseqarluta saaffiginnissut akuersaartumik isummerfigigatsigu oqaatigeqqissavarput.